

## Ekwo, Judu deru

<sup>1</sup> Ekwo-ozí-wa shi l'ẹ́ka mbẹ́dua, bụ Judu; onye ejeru Jisọsu Kuráýisutu ozi; bụkwaruphu nwanne Jémusu.

Ndu mu ede iya anụ bụ iphe bụ unubẹ ndu ono, Nchileke kuru; mee unu; unu aburu ndu nk'íya ono. Nchileke ono, bụ Nna ono bẹ yeru unu obu; unu abụkwaruphu ndu, Jisọsu Kuráýisutu kwakọberu t'ẹ́ b'ọ́ dụ iphe e-me unu; t'unu nọdu ngabẹru abyabya kẹ yẹbe Jisọsu Kuráýisutu ono.

<sup>2</sup> Tẹ Nchileke phụkwaaru unu imiko; yo mee t'ẹ́hu dụ unu agu; yo yekwaruphu unu obu. T'ọ́ tũko iphe ono meeru unu; mbụ meeru iya unu k'etsutsu iya.

### *Ndu ẹjo nzizi*

<sup>3</sup> Ndu ọnya mu, nọ mu l'obu; iphe ivuzọ, mu shi rịa lẹ mu e-deru unu l'ẹ́kwo-ozí-wa bụ k'adzọdzo ono, Nchileke dzọru ayi l'ayi ha; gude koshi lẹ ya yeru ayi obu ono. Obenu lẹ mu byaru bya ari-phu ọriri azụ; sụ l'o nweru iphe ọdo, kachia mkpa, mu e-deru unu. Iphe ono, kachia mkpa ono bụ tẹ mu rọ-chia unu; rọshia unu ike t'unu bya awata ọgbaru ọkpobe okfu ono, Nchileke ziru ndu nk'íya ono ọdzori. Mbụ ọkpobe okfu ono, Nchileke ziru t'ayi kweta; sụ t'ẹ́ b'ọ́ dụkwa onye e-wofu iya iphe ewofu; tọ

dụ onye e-yekwa iya iphe eyekwa ono. <sup>4</sup> Iphe mu gude ekfu iya bụ l'ọ haru nweru ndu ẹ-ta akwabedu Nchileke ugvu. Egbe ndu ono toru nwehu pyabata l'ẹke unu nọ; l'ẹ ba ma. Ẹphe anọduje ezi l'ọ dụmma te madzụ meje umere, rehuru erehu; keshinu ophu Nchileke bụ onye emeje eze-iphe-oma. Ẹphe ajikaje Jisosu Kuráýisutu ono, bụ iya bụ Nnajiufu ayi nkinyi iya ono; bya abukwaru iya phụ nkinyi iya bụ onye gude ndzụ ayi. Lẹ teke ndiche b'e dehaakwaru iya ru l'ekwo okfu Nchileke; sụ: Lẹ Nchileke a-nma ẹphe ikpe iphe ono, ẹphe meru ono.

<sup>5</sup> Iphemiphe obule ono kparamkparamu be unu makotakpooru ohuma ohuma; obu l'iphe mu emelephu te mu nyataru unu bu le teke ndiche be Nnajiufu dzokwaru ndu nk'ia teke ono, ẹphe shi buru l'alị Ijiputu ono. O meru; ẹphe awufuta l'alị ono. O dzobekwaru ẹphe ono; obu l'e meebekwaru; yo gbushilee ndu ophu ẹ-te kwedu woru onwephe ye iya l'eka. <sup>6</sup> Unu nyatakwa ẹge o dakfuru unwu ojozi-imigwe ono l'ẹphe ha, bu ndu ophu kwefuru ike l'ẹphe ta anopyabedu l'ẹke Nchileke doberu ẹphe t'ẹphe chije. Ẹphe jikakaruphu l'ẹphe te ebuduru l'ẹke Nchileke suru t'ẹphe buru l'imigwe. Unwu ojozi-imigwe ono l'ẹphe ha be Nchileke tuakwaru mkporo mgbe-agvu-agvu. O chiru ẹphe ye l'ekpuru-ochi ẹke gbahuru ẹjo tsabalangu. Yo buru ẹke ono be ẹphe a-nodu jeye l'oke uboku ono; mbu mboku ono, Nchileke a-nma ẹphe ikpe. <sup>7</sup> Unu nyatakwapu ẹge o dakfuru Sodomu me Gomora; mewaru iphe bu obodo obodo, ẹphe

l'èphe naru onu ẹgu. Ndu ono l'èphe ha woru onwèphe ye l'ome kẹ nwanyi; mẹwaru iphe ọdo, anyị ishi ẹdzu. Nchileke kpọokwaru ẹphe ọku; yọ buru ẹge ono b'ọo-nụ ẹphe aphụ jeye lẹ tutu yoyo. Iphe ono aburu iphe Nchileke gude alọ ndiphe kpamukpamu ẹka lẹ nchị.

<sup>8</sup> Ọ kwaphu ẹge ono b'ọ dụ ndu ono, ezi ẹjo-ire ono. Ẹphe aroje nrọ, emeje; ẹphe emerushia onwèphe emerushi. Ndu, nọ l'ishi aduje ẹphe ashị. Ndu ono, ẹ ta aphudu l'enya l'ogbu nwịinwii imigwe ono bẹ ẹphe anọduje ekfubyishi ekfubyishi. <sup>9</sup> Ekfubyishi ono, ẹphe ekfubyishi ndu ono ta dukwa m'ọ bụ Màyikelu, bụ onye ishi unwu-ojozi l'imigwe, turu iya ama k'ememe. Mbụ lẹ teke ono, Màyikelu yẹle Sétanu atụ ẹgo onye a-pata odzu Mosisu ono bẹ Màyikelu ta tukwa iya ama k'ophu Sétanu iphu. Iphe o kfuleruphu Sétanu bukwa: "T'ọ buru Nchileke a-baru ngu mba!" <sup>10</sup> Obenu lẹ ndu ono bụ iphe ẹ-te dodu ẹphe ẹnya bẹ ẹphe anọduje ekfubyishi. Ẹphe dụ l'ọ bụ anụ-ẹgu-ẹgbudu, ẹ-te nwedu egomunggo, bụlephu iphe agụ iya nụ bẹ ọomaje; yọ bụleruphu iphe ono bẹ oomeje. Ọ bụ iphe agụ ẹphe; bẹ ẹphe anọduje eme. Yọ buru iya e-gbu ẹphe. <sup>11</sup> Nshọbukwaa ẹphe! Ọ bụ ẹjo ọzo ono, Kenu tsoru teke ndiche ono bẹ ẹphe etsokwaphu; mbụ iphe ono, o meru, kparu iphe o gburu nwunne iya ono. Ndu ọwaa bukwa nchamenya okpoga bẹ kparu iphe ẹphe shisweru ọzo ono, vudo nhamunha ono. Ẹphe emelaha iphe ono, Bélamu meru teke ndiche ono. Yọ bukwaruphu ẹge Kóra kwefuru Nchileke ikè; bụ ẹge ẹphe

wataru ememe. Ẹphe a-lakwanu l'iyi ẹge ọ laru. <sup>12</sup> Ọobuje: ẹphe -bya anonyabe unu l'eri nri l'ẹke unu ọkoberu; tųgbabe nri eri gude ekoshi l'unu yeru onwunu obu; ẹphe aburu iphe-iphere nọduru unu. Iphere ta adujedu ẹphe l'ọ bųlephu onwẹphe; bẹ ẹphe letaru ẹnya. Ẹphe dų l'ọ bų urukpu, phẹrephere phekashiru; egbe iya ọwaa bų: igwe -ruebetsua eruru; phẹrephere ephekashia ya; igwe ta achihe mini ọbu. Ẹphe dų l'ọ bų oshi-ọmi, ẹ-ta amijedu nebyi teke gbaru iya nų. Egbe ndu ono bẹ ọnwu gbuwaru l'ono-ndzų. Ẹ tọ bųledua ugbo anwųhu lanų bẹ ẹphe nwųhuru; kẹ l'e fefuwaru ẹphe tufaa ẹge-a, eefufuje oshi-wa. <sup>13</sup> Ẹphe dųkwaphu l'ọ bų eyii-mini, ha nshinu, atų l'eze ẹnyimu. Ishi iya aburu l'aaphukotaje ẹjo umere ono, rehuru erehu, ẹphe eme ono; l'ọ bų ẹke ọphu-mini tselihuru. Ẹphe adų l'ọ bų mkpọ-kpodo, phuru ọzo. Obenu l'ẹke Nchileke kwakoberu ẹphe bųkwanu tsųbalangu ẹke agba ẹjo ọchi. Yọ bųru ẹke ono bẹ ẹphe a-nọdu jeye lẹ tutu yoyo.

<sup>14</sup> Ọ kwa Ịnọku bų onye ọgbo k'ẹsaa l'eri Ádamu. Ịnọku bẹ Nchileke kfukwaru lẹ ndu ono a-byakwa. Ọo ya kparu iphe Ịnọku deru; sų: "Unu lenu! Nnajiufu bẹ yele ndu nk'iya, bų 'aguta aguta, shi l'imigwe a-yiru bya; <sup>15</sup> bya ekpee ndiphe l'ẹphe ha ikpe. Oo-koshikota iphe bų ndu ono, ẹ-ta madu Nchileke ono iphemiphe ọbule, ẹphe meru, bų iphe dų ẹji. Yo gude emeswe ono, ẹphe mesweru iya ono nma ẹphe ikpe; l'ẹphe ta akwabẹdu iya ugvu; bya anmak-waphu ẹphe ikpe k'iphe bų ẹjo okfu, ẹphe gude

kfubyishia epha iya!”

<sup>16</sup> Ndu ono abuje: iphe -byaru epe; epe awata ogu aphu; l'ata Nchileke uta. Epe eworu onwephe togboru egu ejo iphe, aguebe epe. Iphe eshije epe l'onu abuleruphu oja onwonye mkpokoro ajaja. Epe -phuwa l'o nweru uru, epe e-rita madzu l'eka; epe awata ojakposhi onye obu.

*Okwa ke ovudoshi ike*

<sup>17</sup> Olobu; ndu onya mu; iphe mu eme t'unu maru bu t'unu nyatajelephu iphemiphe obule ono, ndu ishi-ozu Nnajiufu ayi Jisosu Kurayisutu vuhawa uzo kfuaru unu ono. <sup>18</sup> Mbụ iphe ono, epe shi anoduje aguru unu ogu egvu ono, bu iya bu: “L'o -rudelephu teke mgboko-a a-gvu; b'o nwetsuaru ndu a-nodu aja unu ewena. Iphe epe a-nodu awogo eka iya; bu ege epe eshi mee iphe egu iya enwu epe raphuraphu l'ehu; mbụ iphe egu iya agu epe; okfu l'ephe ta akwabedu Nchileke ugvu.” <sup>19</sup> Ndu eme ege ono; bu epe akpataje t'ogbo bua onwephe ebo; wata okpa iche iche. O kwa egu iphe, no le mgboko-a, l'agu epe; be kpu epe l'eka; e to bukwa Ume-du-Nso gude ndzu epe. <sup>20</sup> Olobu; ndu onya mu; unu vudoshikwaa ike lekwekwe ono, du iche, unu kweru ono; mbu ekwekwe ono, shi Nchileke l'eka ono. Unu gude ekwekwe ono vuje evuvu. Unu hajee te Ume-du-Nso koshije unu ege unu e-kfuje anu Nchileke. <sup>21</sup> Unu nopyabelekwaphu le n-yemobu ono, Nchileke yeru unu ono. Unu anodukwaphu ngaberu Nnajiufu, bu Jisosu Kurayisutu t'o phuaru unu

imiko; mekwaaphu t'unu nọdu ndzụ gbururu jeye.

<sup>22</sup> Unu phujekwaaru ndu obu agbakwadu ẹbo imiko. <sup>23</sup> Egbe ndu ono bẹ unu e-yetajeru ẹka; lọfuta ẹphe l'ọku. Unu aphujekwaaruphu ẹphe imiko; mbụ ndu ono, bụ ẹjo iphe, agụ ẹphe; bẹ gude ndzụ ẹphe ono. Olobu; unu ba akwaswejekwaru ẹphe ẹnya teke unu aphuru ẹphe imiko obu. Unu kpojekwaa iphemiphe ọbule, bụ nk'ẹphe ashị; mbụ je akpaa l'uwe, ẹphe yewaru l'ẹhu; bụ iya bụ iphe ẹphe emekpo ememe, bụ iphe ẹjo ọriri ẹphe ono merushiwaru emerushi.

### *T'a jaa Nchileke ajaja*

<sup>24</sup> T'ayi tua Nchileke ẹpha; mbụ onye ono, bụ iya; bẹ iphe bụ ike kpakoru l'ẹka ono. O bụ iya bụ onye aduje ike mee t'unu ba ada; bukwaru iya phụ e-me t'ẹ b'ọ dụ iphe aa-ta unu uta iya teke oo-kuta unu dobe l'ọdu-biribiri iya, bụ ẹke ẹhu a-nọdu atsowaru unu ẹna. <sup>25</sup> T'ayi tua ya ẹpha; l'ọ bụ iya nkinyi iya; bẹ bụ Nchileke; bụru l'ẹka Nnajiufu ayi, bụ Jisusu Kuráyisutu; bẹ oo-shi dzọo ayi. T'ọdu-biribiri; ọburu Ọkaribe-Kakọta-Nụ; ike; ọbu ishi, ọ bụha-oduru temanu; bẹ mg-boko bya anọdu; bụru nk'iya nta-a; bukwaruphu nk'iya jeye lẹ tutu yoyo. Ono kwa ẹge ọ dụ.

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb